

**Date – 25/03/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Larsap General Vijay Kumar Singh chuan Sericulture Department chu theihna nasa tak nei leh hai chhuah tur pawh la nei nasa a nih thu a sawi.
2. Mizo Zirlai Pawl (MZP) chuan Mizoram rawn tlawh tur reng reng chuan Inner Line Permit (ILP) an neih ngei a ngai tih an sawi.
3. US President Donald Trumpa chuan nimin khan Telephone kaltlangin Prime Minister Narendra Modia biain West Asia thil thleng mek a sawipui.
4. Union Agriculture and Farmers Welfare Minister Shivraj Singh Chouhan-a chuan sawrkar hmalakna avangin ramchhunga loneitute sum lakluh nasa takin a pung a ti.



**GOVERNOR**

Larsap General Vijay Kumar Singh chuan Sericulture Department chu theihna nasa tak nei leh hai chhuah tur pawh la nei nasa a nih thu a sawi.

Nizan khan sorkar laipui, Mizoram sorkar leh National Handloom Development Corporation (NHDC) tangkawp in an buatsaihte, Mizoram silk tihhmasawna, thiamthil pholanna leh chawilarna "Tlangro : The Mizoram Silk Runway" chu Aijal Club Park-ah neih niin, khuallian Larsap chuan Mizoram chu silk chi 4 - mulberry, eri, muga leh oak tasar thar chhuahna state a nih thu sawiin, Silk hrang hrang thar chhuah tamna khawpui ni turin theihna kan nei a, hemi tur hian tan erawh kan lak nasat leh zual a tul a ni, a ti.

Larsap chuan sericulture sector tihhmasawn nana pawimawh hrang hrangte tarlangin, inzirtirna changtlung, hmanraw tha zawk chhawpchhuah, tunlai thiamnate chhawr tangkai, hmasawna ruhrel din leh a hralhna lam ngaihtuah, zirbingna nasa zawk neih, thalai tam zawk hip, sawrkar atanga tawiamna tam zawk pek leh hmasawna ngelnghet dinte chu ngaipawimawha neih hmasak a tul thu a sawi bawk.

Khuallian chuan Hmar chhak state nena inzawmna thuk tak nei Muga silk thar chhuahah Mizoramin hma a hruai theih thu sawiin, a chaw tur thlai chin uar, Mizoram pual muga brand siana chawilar, pangang khawi inzirtirna changtlung

zawk neih, mawihnai zawka chhuah thei tura sawngbawl, khualhip nana hman thiam, digital platform leh e-commerce nena thlunzawm, designer leh fashion industry-te nena thawhhona neih bakah, sawrkar puihna hmangtein Muga silk chawilar theih a nih thu a sawi bawk a ni.

(DIPR)



**DTO**

Mizorama District Transport Office (DTO) pariat chhinchiah danin, kum 2024-2025 chhung khan Mizoramah lirthei 28647 ziah luh a ni.

Planning & Programme Implementation Department buatsaih Economic Survey of Mizoram 2025-2026 tarlan danin, Lirthei ziahluh hi VAHAN software hmanga tih a ni a. Aizawl District chu district mala lirthei ziahluh tamna ber niin, nikum chhung khan lirthei 21125 ziah luh a ni a, heng zinga 16565 chu motor cycle/scooter a ni.

Aizawl bakah hian Lunglei, Siaha, Champhai, Kolasib, Lawngtlai leh Mamitah te DTO an awm a, an zingah hian Mamit District chu lirthei ziahluh tlemna ber niin kum kalta chhung khan lirthei 433 an ziaak lut a ni.

Nikum chhunga Mizorama lirthei ziah luh zawng zawng zingah hian Agricultural Tractor paruk a awm a. Aizawl, Lawngtlai leh Mamit ten Agricultural Tractor pahnih theuh an ziaak lut a ni.

(Corr)



**MZP**

Mizo Zirlai Pawl (MZP) chuan Mizoram rawn tlawh tur reng reng chuan Inner Line Permit (ILP) an neih ngei a ngai tih an sawi.

Nimin tlaia thuchhuah an siamah MZP chuan, Temporary ILP pawh awlsam taka lak theih a ni tih an sawi a. Mahse, hei hi sumdawn phalna emaw, hnathawka inhlawh phalna emaw a ni lo tih hriat tur a ni tih sawiin. Mizoram tlawhtute reng reng chuan ILP chu ngaihpaawimawh tur a nih thu an sawi.

**(Voice Cast)**

*(MZP chuan Mizoram-a chengte chu khawsakho leh nun dan mawi danglam tak nei an ni tih sawiin, mite hmuh atan an chhuang hle an ti a. Mizoram rawn tlawh pawp a, ram leilung mawi leh boruak thianghlim te rawn chhim duh tan rilru zau takin an inhawng a. Mikhual duat leh zah hnam pawh an ni tih sawiin, Tourism lama sorkar hmalakna pawh MZP chuan a thlawp hle tih an sawi a. Mahse, mikhual laka that an chhuahnate leh mikhual an lawm viau avanga hian min zuam phah tur a ni lo, an ti a ni.)*

MZP thuchhuah tarlan danin Mizote hi chuan hmeichhia leh naupangte an humhalh tih an sawi a, an laka nungchang mawi lo taka lantirtute chu a en liam mai

mai dawn lo tih sawiin, a tul dan ang zelin khawtlang angin emaw dan hmangin hman la zel dawn tih an sawi bawk a ni.

(PR/Desk)



## FARMERS TRAINING

KVK Khawzawl leh ICAR- National Research Centre (NRC) Grapes, Pune tangkawpin nimin khan Chawngtlai khua-a Grape chingtute hnenah zirtirna an pe.

He hunah ICAR – NRC for Grape Senior Scientist Dr. N.A. Deshmuk chuan Grape cut dan dik zirtirna a pe a. KVK Khawzawl Senior Scientist Dr. Malsawmkimi chuan he hun hi kaihruiin Grape mai bakah kan thlai tharchhuah te tun aia hlawk zawka thar thei tura theihtawp kan chhuah a tulzia leh chumi atana tunlai technology hman thiam a pawimiawhzia a sawi a ni.

KVK Khawzawl Subject Matter Specialist (Plant Protection) Dr. Lalngaihawmi chuan rannung eichhetu laka grape ven dan tur te, natna hrik laka venna tur leh an grape than duhna tur vitamin chungchang te zirtirna a pe a. Chawngtlai khua-a grape chingtute hian an grape chawr rual lo hi an harsatna a ni thin a, heng an harsatna ah hian Dr. Deshmuk Senior Scientist Pune chuan a chawr rual theih dan tur chungchangah hian zirtirna a pe bawk. Grape chingtu kalkhawmte nen inkawmkhawmna hun hman nghal niin, kalkhawmte hnenah grape enkawlina atana leitha, rannung thahna hlo leh natna enkawlina tur bakah vitamin te an pekchhuah nghal a ni.

KVK Khawzawl hian TSP (Tribal Sub Plan) hnuaiiah Hnahlan leh Chawngtlai khuaa grape chingtute hnenah tun aia hlawk zawka an tharchhuah theih nan theihtawp an chhuah mek a ni.

(Lalsangpuii)



## WORLD TB DAY

Ngawr Hri umbo tura beihpui thlakna ni, World TB Day denchhenin Health Minister Pi Lalrinpuii chuan TB natna um bo turin mi zawng zawng a sawm a ni.

Nimin khan MINECO a Taxation Auditorium-ah World TB Day pual hian hun hman a ni a, NHM Mizoram Director Dr R. Lalchhuanawma chuan he hun hi a hmanpui a ni.

Dr R Lalchhuanawma chuan, TB natna umbo kawngah Mizoram dinhmun chu a tha hle a ti a, sorkar laipui ina TB um bo na tura a hmalakna TB mukt bharat abhiyan hnuaiiah khaw tina TB vei awlsam bik tura an ngaih te hming chhinchhiah chhuah vek niin a thlawnin screening neih thin a ni a ti a, mihring awmkhawm tamna thin Jail leh Home-ah te pawh endikna neih thin a ni bawk a ti.

*Kan corr report ngaithla ang.*

Dr R Lalchhuanawma sawi danin, Ram pumpui chu TB awmlohna a siam tura tih a nih angin thingtlang khua ah te bul tan a ni a, in elna thianghlim siam thin a ni a, tun dinhmun ah hian TB free village – TB awmlohna khua puan theih hi khaw 150 lai awmin heng zingah hian khaw 74 te chu kum khat atana TB free village ni thei an ni a, khaw 58 te kum hnih chhunga a zawna TB free village an ni a, khaw 18 te chu kumthum chhung tb free village an lo ni tawh a, Aizawl district chhungah bik chuan TB free village ni thei hi khaw 19 an ni a.

TB Free Village hmalakna kawngah hian VC te hi an mawhphurhna pawimawh tak an nei tih sawiin TB dona atan plan tha tak neiin nasa tak mipui te tanpuina kawngah hma an la thin a ni a ti bawk .

(Hruaia Aizawl PTC)



**TB**

State TB Cell a ACSM Officer Pu Emmanuel Lalhunmawia chuan India sorkar laipui kaihhruaina hnuai ah mipui chakna rinchhanin TB um bo theih a ni tih a sawi.

Akashvani News Aizawlin Sawihona hun a buatsaihah he thu hi sawiin, Pu Emmanuel Lalhunmawia chuan India in a ngaih pawimawh em em chu TB dona kawnga mipui an tel vena a ni tih sawiin, TB natna chu umbo theih a ni tih a sawi bawk.

TB chu inkaichhawn theih a ni tih sawiin a bik takin, chuap TB vei ten boruakah TB hrik an khuh chhuak thei a, chu mi midang tan kai chhawn theih a ni tih a sawi.

Pu Emmanuel Lalhunmawia chuan chuan, kar hnih aia rei khuh, khawsik, rihna tlahniam,. zana thlan fim tla, khak thi, chuap lam fel lo, thawh hah, chaw ei tui lo leh thal be bawk te chu TB lan chhuah dan a ni tih a sawi a, heng zinga eng emaw ber pakhat tal nei an awm pawhin inentir vat a pawimawh tih a sawi bawk.

Mihring takasah hian tin leh sam tih loh chu TB thei vek a ni a, a inven theih dan chu chaw tha ei a ni a, chu chuan taksa raldo khawl a ti chak thei a ni.

(Corr)



**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## Trump & PM Modi

US President Donald Trumpa chuan nimin khan Telephone kaltlangin Prime Minister Narendra Modia biain West Asia thil thleng mek a sawipui. Social Media lamah Pu Modia chuan he thu hi tarlangin President Trump-a hian a rawn biak thu leh West Asia boruak chungchangah inpawh taka an sawidun thu a sawi a. Prime Minister Modia chuan a hma thei ang bera remna siam a, boruak sosang zel tihdai turin India chuan a thlawp reng dawn a ti a. Strait of Hormuz inkalpawhna luhka hawn a duh thu sawiin him taka khawvel pumin an mamawh an phurh kual leh theih a duh thu a sawi a. Hruaitu pahnihte hian inbiak pawh zel an duh thu an sawi a ti bawk.

Prime Minister Narendra Modia hian nimin Rajya Sabha inkhawmah West Asia-a remna leh muanna a awm theih nan inbiakna leh indawrna neih a tul thu a sawi a. West Asia buaina chungchang leh India ngaihndan sawichhuakin Pu Modia chuan India chuan inepna boruak sang zel tihziaawm a duh ber thu leh Strait of Hormuz hawn chu a ngaih pawimawh anih thu a sawi a. West Asia-a buaina a chhuah atangin Gulf ram hruaitute nen telephone hmanga an inbiak pawh reng thu sawiin hei bakah hian Iran, Israel leh United States te pawh a biak thu a sawi a ni.

(Newsonair)



## SC

Supreme Court chuan Hindu, Sikh emaw Buddhist te chauhin Scheduled Caste nihna an nei thei tiin thutlukna a siam. Vawiin khan Supreme Court chuan he thutlukna hi siamin Kristian emaw sakhaw dang emaw a inlet te chuan chawp leh chilhin Scheduled Caste dinhmun an luah mek chu an hloh nghal a ti. Andhra Pradesh High Court thutlukna pawmpuiin Supreme Court chuan tupawh Kristiana a inleha an rindan leh sakhaw thilte a tih ve chuan Schedule Caste member-a ngaih theih an ni tawh lo a ti. He thu hi Justice P.K Mishra leh Manmohan te awmna bench chuan a ngaihtuah a. Dalit zinga Kristiana inlette chuan Scheduled Castes and Scheduled Tribes (Prevention of Atrocities) act in venhimna a pek te an dawng thei tawh lo ang tiin an rel a ni.

(Newsonair)



## UNION AGRIMINISTER

Union Agriculture and Farmers Welfare Minister Shivraj Singh Chouhan-a chuan sawrkar hmalakna avangin ramchhunga loneitute sum lakluh nasa takin a pung a ti. Nimina Lok Sabha-a zawh belhna chhangin Union Minister chuan loneitute sum lakluh hi a let thum dawn tea a pun thu a sawi a. Hmun thenkhatah chuan a let riat laite a pung a awm a ti a. Ramchhunga buhfai tharchhuah chu kum 2014 atang khan zaa 44 laiin a pung tawh a ti bawk.

(Newsonair)

